

27. juli 2021

UKA2021/47

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Naqinnernik ilisarsisinnaanngitsunut Kalaallisut programimik ikiutinik sanasoqarsinnaanissaa pillugu nalunaarusiamik Naalakkersuisut suliaqaqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaqa Aslak W. Jensen, Siumut)

Tungavilersuut:

Meeqqat atuarfiani katattakkagut amerlavallaaleqaat, tamatuma ilorraap tungaanut aallartinnissaanut atortorissaarutit atorlugit aqqissuusseqqinnissaq aqqutissatsialaasoraara.

Nunatsinni amerliartorput naqinnernik ilisarinnissinnaanngitsut ilisimannilersut. Tamannali danmarkimi ilisimaaralugulu, programmeqarput allaat ilinniarnertuunngorniat program atorlugu naammassisarlutik.

Nunatsinnilu amerlanngitsuni programmi danskisoortoq annertugisassaangitsumik atugaalериartuaarpoq.

Meeqqat atuarfiat Hans Lynge qiviaraanni naqinnernik ilisarinnissinnaanngittunut programmi atorlugu atuartitsisoqarsinnaavoq. Meeqqap programmimik atuisup atuarnini pikkoreqaluni karaktereqarluni naammasserpallappaa. Naatsumik program taanna ima piginnaasaqarpoq; oqaaseqatigiit assiliigaanni nipi tooraanni taanna assimiittoq sunaanersoq nipi atorlugu programmimit oqaatigineqartarpoq.

Nunatsinnili qiviarutta oqaatsigut inatsisitigut illersugaapput pisortatigoortumillu oqaasiullutik. Taamaakkaluartorli Kalaallip oqaatsitinnik atuilluartup naqinnernik ilisarinnissinnaanngikkuni periarfissai suuppat?

Tassa imatut paasillugu 2021 suli naqinnernik ilisarinnissinnaanngitsut aammalu qallunaatut 100 %-mik paasisinnaanngitsut periarfissaat atuarnerup silarsuaani annikitsuararsuupput.

Inuttut sunniutaat makkuusinnaapput:

- Danskisut paasinnilluarsinnaanngikkaanni naqinnernik ilisarinnissinnaanngitsoq ilinniarnissamut periarfissaqanngilaq.
- Meeqqat atuarfianiilli Inuttut naleqassuseq allaniit annikinnerusoq malunniuttarpoq.
- Kamaqalerneq
- Paasineqarsinnaannginneq
- Tiimerpassuit atorlugit allat assigalugit atuartinniarneqarneq
- Atuaqquneqarneq (Atuakkatigut)



TILIOQ-p nittartagaani immikkoortumi 7-mi allaqqavoq:

"Kalaallit Nunaata meeqqat innarluutillit pisinnaatitaaffiiniq atuutitsinissaq isumagisussaavaa. Meeqqat allat pisinnaatitaaffeqarnerattulli pineqartussaammata."

Immikkoortoq 24-mi allaqqavoq:

"Inuit innarluutillit pisinnaatitaaffeqarput Kalaallit Nunaata nunap ilinniagaqarfiini atuarfiit tikikkuminartuunissaat isumagissavaa."

Kingullerlu immikkoortoq 24-mi aamma allaqqasoq ersarivimmik inatsisitigut periarfissiivoq:

"Inuit allat naligaluqit innarluutillit atuartinneqarnissaannut periarfissaqartariaqarput"

Tassani ersinngitsumik nappaatillit ADHD/AUTISME, naqinnernillu ilisarinnissinnaanngitsut, eqimattatut akulerullugit atuartinneqartarput nappaataat assigiinngikkaluit, allaammi taakkuluunniit nappaatiginngikkaluarlugit inuttut meeqqat immikkut pisariaqartitsisut ilanngullugit akulerullugit klassemi atuartinneqartarput. Assassornerullutik.

Inatsisitigut tamakkiisumik meeraq illersorniassagutsigu aaqiisoqartariaqarpoq, taamaattumik inatsisartut ataatsimoorullugu naqinnernik ilisarinnissinnaanngittut allatuulli ilinniarsinnaaqullugit atortorissaarutinik periarfissaqalernissaannik alloriarneq siulleq tigusariaqarparput.

Pisortanut aningaasatigut allaffissornikkullu kingunerisassat:

Aningaasatigut kingunerisassai naatsorsuutigineqarput ukioq ataaseq nalunaarusiornikkut suliassaq A/C-erimik ataatsimik nalinganik annerunavianngitsoq, tamanna 500.000 kr.-inik naleqassassoq.

Namminersorluni inuussutissarsiuteqarnermut aningaasatigut allaffissornikkullu kingunerisassat:

Soqanngilaq

Innuttaasunut aningaasatigut allaffissornikkullu kingunerisassat:

Soqanngilaq